

摘藻堂四庫全書薈要

集部

欽定四庫全書薈要

集部

東坡全集卷十三
四

詳校官助教_臣常循



欽定四庫全書薈要卷一萬四千八百四十五


集部

東坡全集卷十三

宋 蘇軾 撰

詩八十一首

蜜酒歌 并敘

西蜀道士楊世昌善作蜜酒絕醇醖余既得其方作此歌遺之

真珠為漿玉為醴六月田夫汗流泚不如春甕自生香
蜂為耕耘花作米一日小沸魚吐沫二日眩轉清光活

三日開甕香滿城快瀉銀餅不須撥百錢一斗濃無聲
甘露微濁醍醐清君不見南園採花蜂似雨天教釀酒
醉先生先生年來窮到骨問人乞米何曾得世間萬事
真悠悠蜜蜂大勝監河侯

又一首荅二猶子與王郎見和

脯青苔炙青蒲爛蒸鵝鴨乃瓠壺煮豆作乳脂為酥高
燒油燭斟蜜酒貧家百物初何有古來百巧出窮人搜
羅假合亂天真詩書與我為麴蘖醞釀老夫成搢紳質

非文是終難久脫冠還作扶犁叟不如蜜酒無懊寒冬
不加甜夏不酸老夫作詩殊少味愛此三篇如酒美封
胡羯未已可憐不知更有王郎子

謝陳季常惠一揩巾

夫子胸中萬斛寬此巾何事小團團半升僅漉淵明酒
二寸纔容子夏冠好帶黃金雙得勝可憐白紵一生酸
臂弓腰箭何時去直上陰山取可汗

贈黃山人

面頰照人元自赤眉毛覆眼見來烏倦遊不擬談玄牝
示病何妨出白鬚絕學已生真定惠說禪長咲老浮屠
東坡若肯三年住親與先生看藥爐

問大冶長老乞桃花茶栽東坡

周詩記苦荼茗飲出近世初緣厭梁肉假此雪昏滯嗟
我五畝園桑麥苦蒙翳不令寸地閒更乞茶子藝饑寒
未知免已作太飽計庶將通有無農耒不相戾春來凍
地裂紫笋森已銳牛羊煩訶叱筐筥未敢睨江南老道

人齒髮日夜逝他年雪堂品空記桃花裔

魚蠻子

江淮水為田舟楫為室居魚鰕以為糧不耕自有餘異
哉魚蠻子本非左袵徒連排入江住竹瓦三尺廬於焉
長子孫戚施且侏儒擘水取魴鯉易如拾諸途破釜不
著鹽雪鱗芼青蔬一飽便甘寢何異獺與狙人間行路
難踏地出賦租不如魚蠻子駕浪浮空虛空虛未可知
會當筭舟車蠻子叩頭泣勿語桑大夫

弔李臺卿并敘

李臺卿字明仲廬州人貌陋甚性介不羣而博學強記罕見其比好左氏有史學考正同異多所發明知天文律厯千載之日可坐數也軾謫居黃州臺卿為麻城主簿始識之既罷居於廬而曹光州演甫以書報其亡臺卿光州之妻黨也

我初未識君人以君為笑垂頭若病鶴煙雨霾七竅樊衣來過我危坐若持釣褚裒半面新驂蔑一語妙徐徐

涉其瀾極望不得徼却觀元嫵媚士固難輕料看書眼
如月罅隙靡不照我老多遺忘得君如再少從橫通雜
藝甚博且知要所恨言無文至老幽不耀其生世莫識
已死誰復吊作詩遺故人庶解俗子譙

曹既見和復次其韻

造物本兒戲風噫雷電笑誰令妄驚怪失匕號萬竅人
走江湖一一操網釣偶然連六鰲便謂此手妙空令
任公子三歲蹲海徼長貧固不辭一死實未料難將著

草筭除用佛眼照何人嗣家學恨子兒尚少嗟我與公
曹衰老世不要空言今無救奇志後必耀吟公五字詩
義重千金弔收藏慎勿出免使羣兒譙

次韻孔毅甫集古人句見贈五首

羨君戲集他人詩指呼市人如使兒天邊鴻鵠不易得
便令作對隨家雞退之驚笑子美泣問君久假何時歸
世間好句世人共明月自滿千家墀

紫駝之峯人莫識雜以雞豚真可惜今君坐致五侯鯖

盡是猩脣與熊白路傍拾得半段槍何必開爐鑄矛戟
用之如何在我耳入手當令君喪魄

天下幾人學杜甫誰得其皮與其骨劃如太華當我前
跛狎欲上驚嶮崿名章俊語紛交衡無人巧會當時情
前生子美只君是信手拈得俱天成

詩人雕刻閒草木搜抉肝腎神應哭不如默誦千萬首
左抽右取談笑足夜吟石鼎聲悲秋可憐好事劉與侯
何當一醉百不問我欲眠矣君歸休

膏明蘭臭俱自焚象牙翠羽戕其身多言自古為數窮
微中有時堪解紛癡人但數羊羔兒不知何者是左慈
千章萬句卒非我急走捉君應已遲

六年正月二十日復出東門仍用前韻

亂山環合水侵門身在淮南盡處村五畝漸成終老計
九重新掃舊巢痕豈惟見慣沙鷗熟已覺來多釣石溫
長與東風約今日暗香先返玉梅魂

食柑

一雙羅帕未分珍林下先嘗愧逐臣
露葉霜枝翦寒碧
金盤玉指破芳辛
清泉蔌蔌先流齒
香霧霏霏欲喫人
坐客慙慙為收子
千奴一掬奈吾貧

大寒步至東坡贈巢三

春雨如暗塵春風吹倒人
東坡數間屋巢子與誰鄰
空床歛敗絮破竈鬱生薪
相對不言寒哀哉知我貧
我有一瓢酒獨飲良不仁
未能賴我頰聊復濡子唇
故人千鍾祿馭吏醉吐茵
那知我與子坐作寒蛩呻
努力莫怨

天我尔皆天民行看花柳動共享無邊春

元脩菜

并敘

菜之美者有吾鄉之巢故人巢元脩嗜之余亦嗜之元脩云使孔北海見當復云吾家菜邪因謂之元脩菜余去鄉十有五年思而不可得元脩適自蜀來見余於黃乃作是詩使歸致其子而種之東坡之下云

彼美君家菜鋪田綠茸茸豆莢圓且小槐芽細而豐種之秋雨餘擢秀繁霜中欲花而未萼一一如青蟲是時

青裙女採蘋何忽忽烝之復湘之香色蔚其饒點酒下
鹽豉縷橙芼薑葱那知雞與豚但恐放箸空春盡苗葉
老耕翻煙雨叢潤隨甘澤化暖作青泥融始終不我負
力與糞壤同我老忘家舍楚音變兒童此物獨嫵媚終
年繫余胸君歸致其子囊盛勿函封張騫移苜蓿適用
如葵菰馬援載薏苡羅生等蒿蓬懸知東坡下塉鹵化
千鍾長使齊安人指此說兩翁

二月三日點燈會客

江上東風浪接天，苦寒無賴破春妍。
試開雲夢羔兒酒，快瀉錢塘藥玉船。
蠶市光陰非故國，馬行燈火記當年。
冷烟濕雪梅花在，留得新春作上元。

上巳日與二三子攜酒出游隨所見輒作數句
明日集之為詩故詞無倫次

薄雲霏霏不成雨，杖藜曉入千花塢。
柯丘海棠吾有詩，獨笑深林誰敢侮。
三杯卯酒人徑醉，一枕春睡日亭午。
竹間老人不讀書，留我閉門誰教汝。
出簷聚枳十圍大。

寫真素壁千蛟舞東坡作塘今幾尺攜酒一勞農工苦
却尋流水出東門壞垣古塹花無主卧開桃李為誰妍
對立鵲鵲相媚嫵開餅藉草勸行路不惜春衫汙泥土
褰裳共過春草亭扣門却入韓家圃轆轤繩斷井深碧
鞦韆索挂人何所映簾空復小桃枝乞漿不見磨門女
南上古臺臨斷岸雪陣翻空迷仰俯故人餽我玉葉羹
火冷煙消誰為煮崎嶇東緼下荒徑姪姪隔花聞好語
更隨落景盡餘樽却傍孤城得僧宇主人勸我洗足眠

倒床不復聞鐘鼓明朝門外泥一尺始悟三更雨如許
平生所向無一遂茲遊何事天不阻固知我友不終窮
豈弟君子神所予

日日出東門

日日出東門步尋東城遊城門抱關卒笑我此何求我
亦無所求駕言寫我憂意適忽忘返路窮乃歸休懸知
百歲後父老說故侯古來賢達人此路誰不由百年寓
華屋千載歸山丘何事羊公子不肯過西州

南堂五首

江上西山半隱堤此邦臺館一時西南堂獨有西南向
卧看千帆落淺溪

莫年眼力嗟猶在多病顛毛却未華故作明窓書小字
更開幽室養丹砂

他時雨夜困移床坐厭愁聲點客腸一聽南堂新瓦響
似聞東塢小荷香

山家為割千房蜜稚子新畦五畝蔬更有南堂堪著客

不憂門外故人車

掃地焚香閉閤眠
簟紋如水帳如煙
客來夢覺知何處
挂起西窓浪接天

次韻子由種杉竹

吏散空庭雀噪簷
閉門獨宿夜厭厭
似聞梨棗同時種
應與杉篁刻日添
糟麴有神薰不醉
雪霜誇健巧相沾
先生坐待清陰滿
空使人人歎滯淹

孔毅甫妻挽詞

結襦記初歡同穴期晚歲擇夫得溫嶠生子勝王濟高
風相賓友古義仍兄弟從君吏隱中窮達初不計云何
抱沈疾俯仰便一世幽陰淒房櫳芳澤在巾袂百年縱
得滿此路行亦逝那將有限身長瀉無益涕君文照古
今不比山石脆當觀千字誅寧用百金瘞

次韻孔毅甫久旱已而甚雨三首

饑人忽夢飯甌溢夢中一飽百憂失只知夢飽本來空
未悟真饑定何物我生無田食破硯尔來硯枯磨不出

去年太歲空在酉傍舍壺漿不容乞今年旱勢復如此
歲晚何以黔吾突青天蕩蕩呼不聞况欲稽首號泥佛
甕中蜥蜴尤可笑跂跂脈脈何等秩陰陽有時雨有數
民是天民天自恤我雖窮苦不如人要亦自是民之一
形容可似喪家狗未肯弭耳爭投骨倒冠落幘謝朋友
獨與蚊雷共圭華故人嗔我不開門君視我門誰肯屈
可憐明月如潑水夜半清光翻我室風從南來非雨候
且為疲人洗烝鬱褰裳一和快哉謠未暇饑寒念明日

去年東坡拾瓦礫自種黃桑三百尺今年刈草蓋雪堂
日炙風吹面如墨平生懶惰今始悔老大勤農天所直
沛然例賜三尺雨造化無心悅難測四方上下同一雲
甘靈不為龍所隔俗有分龍日蓬蒿下濕迎曉未燈火新涼
催夜織老夫作罷得甘寢卧聽牆東人響屐奔流未已
坑谷平折葦枯荷恣漂溺腐儒龕櫛支百年力耕不受
衆目憐破陂漏水不耐旱人力未至求天全會當作塘
徑千步橫斷西北遮山泉四鄰相率助舉杵人人知我

囊無錢明年共看決渠雨饑飽在我寧關天誰能伴我
田間飲醉倒惟有支頭甌

天公號令不再出十日愁霖併為一君家有田水冒田
我家無田憂入室不如西州楊道士萬里隨身惟兩膝
沿流不惡汴亦佳一葉扁舟任漂突山芎麥麴都不用
泥行露宿終無疾夜來饑腸如轉雷旅愁非酒不可開
楊生自言識音律洞簫入手清且哀不須更待秋井塌
見人白骨方銜盃

初秋寄子由

百川日夜逝物我相隨去惟有宿昔心依然守故處憶
在懷遠驛閉門秋暑中藜羹對書史揮汗與子同西風
忽淒厲萬葉穿戶牖子起尋袂衣感歎執我手朱顏不
可恃此語君勿疑別離恐不免功名定難期當時已淒
斷況此兩衰老失塗既難追學道恨不早買田秋已議
築室春當成雪堂風雨夜已作對床聲

和黃魯直食筍次韻

飽食有殘肉饑食無餘菜紛然生喜怒似被狙公賣尔
來誰獨覺凜凜白下宰

太和古
白下

一飯在家僧至樂甘不

壞多生味蠹簡食筍乃餘債蕭然映樽俎未肯雜菰芥
君看霜雪姿童稚已耿介胡為遭暴橫三嗅不忍噉朝
來忽解籜勢迫風雷噫尚可餉三閭飯筒纏五采

聞子由為郡僚所掊恐當去官

少學不為身宿志固有在雖然敢自必用舍置度外天
初若相我發迹造宏大豈敢負所付捐軀欲投會寧知

事大繆舉步得狼狽我已無可言墜甌難追悔子雖僅
自免雞肋安足賴低回畏罪畧黽俛敢言退若人疑或
使為子得微罪時哉歸去來共抱東坡耒

次韻王鞏南遷初歸二首

問君謫南賓野葛食幾尺逢人瘴髮黃入市胡眼碧三
年不易過坐睨倚天壁歸來貌如故妙語仍破鐫那能
廢詩酒亦未妨禪寂願為尚書郎還賜尚方鳥

江家舊池臺脩竹圍一尺歸來萬事非惟見秦淮碧平

生痛飲處遺墨鴉棲壁西來故父客金印雜鳴鏑三槐
老更茂花絮春寂寂中微未可料家廟藏赤烏

孔毅甫以詩戒飲酒問買田且乞墨竹次其韻
酒中真復有何好孟生雖賢未聞道醉時萬慮一掃空
醒後紛紛如宿草十年揩洗見真妄石女無兒焦穀稿
此身何異貯酒瓶滿輒予人空自倒武昌痛飲豈吾意
性不違人遭客惱君家長松十畝陰借我一庵聊洗心
我田方寸耕不盡何用百頃糜千金枕書睡熟呼不起

好學憐君工雜擬且將墨竹換新詩潤色何須待東里
任師中挽詞

大任剛烈世無有疾惡如風朱伯厚小任溫毅老更文
聰明慈愛小馮君兩任才行不須說疇昔並友吾先人
相看半作晨星沒可憐太白與殘月大任先去冢未乾
小任相繼呼不還強寄一樽生死別樽中有淚酒應酸
貴賤賢愚同盡耳君家不盡緣賢子人間得喪了無憑
只有天公終可倚

子由作二頌頌石臺長老同公手寫蓮經字如
黑蟻且誦萬遍脇不至席二十餘年予亦作

二首

眼前擾擾黑虵蝓口角霏霏白唾珠要識吾師無礙處
試將燒却看嗔無

眼睛心地兩虛圓脇不沾床二十年誰信吾師非不睡
睡蛇已死得安眠

鄧忠臣母周挽詞

微生真草木無處謝天力
慈顏如春風不見桃李實
古今抱此恨有志俯仰失
公子豈先知戰戰常惜日
吾君日月照委曲到肝膈
哀哉人子心吾何愛一邑
家庭拜前後粲然發笑色
豈比黃壤下焚瘞千金壁
若人道德人視此亦戲劇
聊償曾閔意遽與仙佛寂
孤纍卧江渚永望墳墓隔
作詩相楚挽感慟淚載滴

徐君猷挽詞

一舸南遊遂不歸清江赤壁照人悲
請看行路無從涕

盡是當年不忍欺
雪後獨來栽柳處
竹間行復採茶時
山城散盡樽前客
舊恨新愁只自知

和蔡景繁海州石室

芙蓉仙人

石曼卿也

舊遊處蒼藤翠壁初無路
戲將桃核果

黃泥石間散擲如風雨
坐令空山出錦繡
倚天照海花無數
花間石室可容車
流蘇寶蓋窺靈宇
何年霹靂起神物
玉棺飛出王喬墓
當時醉卧動千日
至今石縫餘糟醕
仙人一去五十年
花老室空誰作主
手植數松今

偃蓋蒼髯白甲低瓊戶我來取酒酌先生後車仍載胡
琴女一聲冰鐵散巖谷海為瀾翻松為舞尔來心賞復
何人持節中郎醉無伍獨臨斷岸呼出日紅波碧巘相
吞吐徑尋我語覓餘聲拄杖彭鏗叩銅鼓長篇小字遠
相寄一唱三歎神淒楚江風海雨入牙頰似聽石室胡
琴語我今老病不出門海山巖洞知何許門外桃花自
開落床頭酒甕生塵土前年開閣放柳枝今年洗心參
佛祖夢中舊事時一笑坐覺俯仰成今古願君不用刻

此詩東海桑田真旦暮

和秦太虛梅花

西湖處士骨應槁只有此詩君壓倒東坡先生心已灰
為愛君詩被花惱多情立馬待黃昏殘雪消遲月出早
江頭千樹春欲闌竹外一枝斜更好孤山山下醉眠處
點綴裙腰紛不掃萬里春隨逐客來十年花送佳人老
去年花開我已病今年對花還草草不如風雨卷春歸
收拾餘香還畀昊

再和寄潜師

化工未議蘇羣槁先向寒梅一傾倒江南無雪春瘴生
為散冰花除熱惱風清月落無人見洗粧自趁霜鐘早
惟有飛來雙白鷺玉羽瓊林鬪清好吳山道人心似水
眼淨塵空無可掃故將妙語寄多情橫機欲試東坡老
東坡習氣除未盡時復長篇書小草且撼長條餐落英
忍饑未擬窮呼昊

橄欖

紛紛青子落紅鹽正味森森苦且嚴待得微甘回齒頰
已輸崖蜜十分甜

海棠

東風嫋嫋泛崇光香霧霏霏月轉廊只恐夜深花睡去
更燒高燭照紅粧

東坡

雨洗東坡月色清市人行盡野人行莫嫌犂确坡頭路
自愛鏗然曳杖聲

生日王郎以詩見慶次其韻并寄茶二十一片
折揚新曲萬人趨獨和先生于為于但信櫝藏終自售
豈知盟脫本無撫竭從冰叟來游宦肯伴臞仙亦號儒
棠棣並為天下士芙蓉曾到海邊郭不嫌霧谷靈松柏
終恐虹梁荷棟桴高論無窮如鋸屑小詩有味似連珠
感君生日遙稱壽祝我餘年老不枯未辦報君青玉案
建溪新餅截雲腴

別黃州

病瘡老馬不任鞿猶向君王得敝帷
桑下豈無三宿戀樽前聊與一身歸
長腰尚載撐腸米潤領先裁蓋纓衣
投老江湖終不失來時莫遣故人非

過江夜行武昌山上聞黃州鼓角

清風弄水月銜山幽人夜渡吳王峴
黃州鼓角亦多情送我南來不辭遠
江南又聞出塞曲半雜江聲作悲健
誰言萬方聲一槩鼉憤龍愁為余變
我記江邊枯柳樹未死相逢真識面
他年一葉泝江來還吹此曲相迎餞

自興國往筠宿石田驛南二十五里野人舍

溪上青山三百疊快馬輕衫來一抹倚山脩竹有人家
橫道清泉知我渴芒鞋竹杖自輕軟蒲薦松床亦香滑
夜深風露滿中庭惟見孤螢自開闔

將至筠先寄遲适遠三猶子

露宿風餐六百里明朝飲馬南江水未見豐盈犀角兒

先逢玉雪王郎子

時道逢王郎於建昌方北行也

對床欲作連夜語念

汝還須戴星起夜來夢見小於菟

遠小名虎兒

猶是髣髴垂

兩耳憶過濟南春未動三子出迎殘雪裏我時移守古
河東酒肉淋漓渾舍喜而今憔悴一羸馬逆旅擔夫相
汝尔出城見我定驚嗟身健窮愁不須耻我為乃翁留
十日掣電一歡何足恃惟當火急作新詩一醉兩翁勝
酒美

端午游真如遲適遠從子由在酒局

一與子由別却數七端午身隨綵絲繫心與昌歎苦今
年疋馬來佳節日夜數兒童喜我至典衣具雞黍水餅

既懷鄉飯筒仍慙楚謂言必一醉快作西川語寧知是
官身糟麴困薰煮獨攜三子出古剎訪禪祖高談付梁
羅詩律到阿虎歸來一調笑慰此長齟齬

梁羅遲
適小名

別子由三首

兼別
遲

知君念我欲別難我今此別非他日風裏楊花雖未定
雨中荷葉終不濕三年磨我費百書一見何止得雙璧
願君亦莫歎留滯六十小劫風雨疾

先君昔愛洛城居我今亦過嵩山麓水南卜宅吾豈敢

試向伊川買脩竹又聞緱山好泉眼傍市穿林瀉冰玉
遙想茅軒照水開兩翁相對清如鵲

兩翁歸隱非難事惟要傳家好兒子憶昔汝翁如汝長
筆頭一落三千字世人聞此皆大笑慎勿生兒兩翁似
不知樗櫟薦明堂何事鹽車壓千里

初別子由至奉新作

雙鵲先我來飛上東軒背書隨好夢到人與佳節會一
歡難把玩回首了無在却渡來時溪斷橋號淺瀨茫茫

暑天濶藹藹孤城背青山
眊眊中落日淒涼外盛衰豈
吾意離合非所礙何以解我憂粗了一事大

同年程筠德林求先墳二詩

思成堂

宰樹連山谷祠堂照路隅
養松無觸鹿助祭有馴烏
歸
夢先寒食兒啼到白鬚
遙知隣里化醉叟道爭扶

歸真亭

舊笑桓司馬今師鄭大夫
不知徂歲月空覺老楸梧
祭

禮傳家法阡名載版圖會看千字誅木杪見龜趺

過建昌李野夫公擇故居

彭蠡東北源廬阜西南麓何人脩水上種此一雙玉思
之不可見破宅餘脩竹四隣戒莫犯十畝森似束我來
仲夏初解籜呈新綠幽鳥向我鳴野人留我宿裴回不
忍去微月挂喬木遙想他年歸解組巾一幅對床老兄
弟夜雨鳴竹屋卧聽隣寺鐘書窓耿殘燭

初入廬山三首

青山若無素偃蹇不相親要識廬山面他年是故人
自昔懷清賞神游杳藹間如今不是夢真箇在廬山
芒屨青竹杖自挂百錢游可怪深山裏人人識故侯

圓通禪院先君舊游也四月二十四日晚至宿
焉明日忌日也乃手寫寶積獻蓋頌佛一偈
以贈長老僊公僊拊掌笑曰昨夜夢寶蓋飛
下著處輒出火豈此祥乎乃作是詩院有蜀
僧宣建事訥長老識先君云

石耳峯頭路接天梵音堂下月臨泉此生初飲廬山水
他日徒參雪竇禪袖裏寶書猶未出夢中飛蓋已先傳
何人更識嵇中散野鶴昂藏未是仙

子由在筠作東軒記或戲之為東軒長老其壻
曹煥往筠余作一絕句送曹以戲子由曹過
廬山出以示圓通慎長老慎欣然亦作一絕
送客出門歸入室趺坐化去子由聞之乃作
二絕一以荅予一以荅慎明年余過圓通始

得其詩乃追次慎韻

君到高安幾日回一時斗數舊塵埃贈君一籠牢收取

盛取東軒長老來

余送曹煥

東軒長老未相逢已見黃州一信通何必揚眉資目擊

須知千里事同風

慎老和余韻

東軒只似虛空樣何處人家籠解盛縱使盛來無處著

雪堂自有老師兄

子由荅予詩

擔頭挑得黃州籠行過圓通一笑開却到山前人已寂

亦無一物可擔回

子由答
慎詩

大士何曾有生死小儒底處覓窮通
偶留一峽千山上散作人間萬竅風

余和
慎詩

余過溫泉壁上有詩云直待衆生總無垢我方
清冷混常流問人云長老可遵作遵已退居
圓通亦作一絕

石龍有口口無根自在流泉誰吐吞
若信衆生本無垢此泉何處覓寒溫

世傳徐凝瀑布詩云一條界破青山色至為塵
陋又偽作樂天詩稱美此句有賽不得之語
樂天雖涉淺易然豈至是哉乃戲作一絕

帝遣銀河一派垂古來惟有謫仙詞飛流濺沫知多少
不與徐凝洗惡詩

書李公擇白石山房

偶尋流水上崔嵬五老蒼顏一笑開若見謫仙煩寄語
匡山頭白早歸來

贈東林總長老

溪聲便是廣長舌
山色豈非清淨身
夜來八萬四千偈
他日如何舉似人

題西林壁

橫看成嶺側成峯
遠近高低無一同
不識廬山真面目
只緣身在此山中

廬山二勝

并敘

余遊廬山南北得十五六其勝殆不可勝紀而懶不作

詩獨擇其尤者作二首

開先漱玉亭

高巖下赤日深谷來悲風擘開青玉峽飛出兩白龍亂
沫散霜雪古潭搖清空餘流滑無聲快寫雙石飢我來
不忍去月出飛橋東蕩蕩白銀闕沈沈水精宮願隨琴
高生脚踏赤鯁公手持白芙蓉跳下清冷中

栖賢三峽橋

吾聞太山石積日穿綫溜况此百雷霆萬世與石鬬深

行九地底險出三峽右長輪不盡溪欲滿無底竇跳波
翻潛魚震響落飛狄清寒入山骨草木盡堅瘦空濛烟
靄間瀕洞金石奏彎彎飛橋出澥澥半月鼓玉淵神龍
近雨電亂晴晝垂鉗得清甘可嚙不可漱

陶驥子駿佚老堂二首

文舉與元禮尚得稱世舊淵明吾所師夫子乃其後挂
冠不待年亦豈為五斗我歌歸來引

余增損淵明歸去
來以就聲律謂之

引歸來千載信尚友相逢黃卷中何似一盃酒君醉我且

歸明朝許來否

我從廬山來目送孤飛雲路逢陸道士知是千歲人試
問當時友虎溪已埃塵似聞佚老堂知是幾世孫能為
五字詩仍戴漉酒巾人呼小靖節自號葛天民

和李太白

并敘

李太白有潯陽紫極宮感秋詩紫極宮今天慶觀也道
士胡洞微以石本示予蓋其師卓玘之所刻玘有道術
節義過人今亡矣太白詩云四十九年非一往不可復

今予亦四十九感之次其韻玉芝一名瓊田草洞微種
之七八年矣云更數年可食許以遺余故并記之

何處聞秋聲脩脩北窓竹回薄萬古心攬之不盈掬靜
坐觀衆妙浩然媚幽獨白雲南山來就我簷下宿懶從
唐生決蓋訪季主卜四十九年非一往不可復野情轉
蕭散世道有翻覆陶令歸去來田家酒應熟

李太白詩

寄卧虛寂堂月明浸疎竹泠然洗我心欲飲不可掬流
光發永歎自昔非予獨行年四十九還此北窓宿緬懷

卓道人白首寓醫卜謫仙固遠矣此士亦難復世迺如奕棋變化不容覆惟應玉芝老待得蟠桃熟

次韻道潛留別

為聞廬岳多真隱故就高人斷宿攀已喜禪心無別語尚嫌剃髮有詩斑異同更莫疑三語物我終當付八還到後與君開北戶舉頭三十六青山

東坡全集卷十三

欽定四庫全書薈要卷一萬四千八百四十六

集部

東坡全集卷十四

宋 蘇軾 撰

詩七十九首

岐亭五首

并叙

元豐三年正月余始謫黃州至岐亭北二十五里山上有白馬青蓋來迎者則余故人陳慥季常也為留五日賦詩一篇而去明年正月復往見之季常使人勞余於中塗余久不殺恐季常之為余殺也則以前韻作詩為

殺戒以遺季常季常自爾不復殺而岐亭之人多化之
有不食肉者其後數往見之往必作詩詩必以前韻凡
余在黃四年三往見季常而季常七來見余蓋相從百
餘日也七年四月余量移汝州自江淮徂雒送者皆止
慈湖而季常獨至九江乃復用前韻通為五篇以贈之
昨日雲陰重東風融雪汁遠村草木暗近舍烟火濕下
有隱君子嘯歌方自得知我犯寒來呼酒意頗急拊掌
動鄰里遶村捉鵝鴨房櫬鏘鐃聲蔬果照巾幕久聞萋

蒿美初見新芽赤洗盞酌鶯黃磨刀削熊白須臾我徑
醉坐睡落巾幘醒時夜向闌唧唧銅餅泣黃州豈云遠
但恐朋友缺我當安所主君亦無此客朝來靜庵中惟
見峯巒集

我哀籃中蛤閉口護殘汁又哀網中魚開口吐微濕剗
腸彼交病過分我何得相逢未寒溫相勸此最急不見
盧懷慎烝壺似烝鴨坐客皆忍笑髡然發其鬣不見王
武子每食刀機赤琉璃載烝豚中有人乳白盧公信寒

陋衰髮得滿幘武子雖豪華未死神已泣先生萬金壁
護此一蟻缺一年如一夢百歲真過客君無廢此篇嚴
詩編杜集

君家蜂作窠歲歲添漆汁我身牛穿鼻卷舌聊自濕二
年三過君此行真得得愛君似劇孟叩門知緩急家有
紅頰兒能唱綠頭鴨行當隔簾見花霧輕幕幕為我取
黃封親拆官泥赤仍須煩素手自點葉家白樂哉無一
事十年不蓄幘閉門弄添丁哇笑雜呱泣西方正苦戰

誰補將帥缺披圖見八陣合散更主客不須親戎行坐
論教君集

酸酒如蠶湯甜酒如蜜汁三年黃州城飲酒但飲濕我
如更揀擇一醉豈易得幾思壓茅柴禁網日夜急西鄰
推甕盎醉倒猪與鴨君家大如掌破屋無遮幕何從得
此酒冷面妬君赤定應好事人千石供李白為君三日
醉蓬髮不暇幘夜深欲逾垣臥想春甕泣君奴亦笑我
鬢齒行禿缺三年已四至歲歲遭惡客人生幾兩履莫

厭頻來集

枯松強鑽膏槁竹欲瀝汁兩窮相值遇相哀莫相濕不
知我與君交遊竟何得心法幸相語頭然未為急願為
穿雲鵲莫作將雛鴨我行及初夏煮酒映疏簾故鄉在
何許西望千山赤茲遊定安歸東泛萬頃白一歡寧復
再起舞花墮幘將行出苦語不用兒女泣吾非固多矣
君豈無一缺各念別時言閉戶謝衆客空堂淨掃地虛
白道所集

郭祥正家醉畫竹石壁上郭作詩為謝且遺古

銅劍二

空腸得酒芒角出肝肺槎牙生竹石森然欲作不可回
吐向君家雪色壁平生好詩仍好畫書牆浣壁長遭罵
不嗔不罵喜有餘世間誰復如君者一雙銅劍秋水光
兩首新詩爭劒鎗劍在床頭詩在手不知誰作蛟龍吼

龍尾硯歌

并引

余舊作鳳咮石硯銘其略云蘇子一見名鳳咮坐令龍

尾羞牛後已而求硯於歛歛人云子自有鳳味何以此
為蓋不能平也奉議郎方君彥德有龍尾大硯奇甚謂
余若能作詩少解前語者當奉餉乃作此詩

黃琮白琥天不惜顧恐貪夫死懷璧君看龍尾豈石材
玉德金聲寓於石與天作石來幾時與人作硯初不辭
詩成鮑謝石何與筆落鍾王硯不知錦綉玉匣俱塵垢
擣練支床亦何有况嗔蘇子鳳味銘戲語相嘲作牛後
碧天照水風吹雲明窓大几清無塵我生天地一閑物

蘇子亦是支離人
麤言細語都不擇
春蚓秋蛇隨意畫
願從蘇子老東坡
仁者不用生分別

張近幾仲有龍尾子石硯以銅劒易之

我家銅劒如赤蛇
君家石硯蒼壁櫝
而窪君持我劒向
何許太明宮裏玉
佩鳴衝牙我得君
硯亦安用雪堂窓
下爾雅箋蟲鰕二
物與人初不異飄
落高下隨風花崩
緌玉具皆外物視
草草立無等差君
不見秦趙城易壁
指圖晚柱相矜誇
又不見二生妾換
馬驕鳴啜泣思其

家不如無情兩相與永以為好譬之桃李與瓊華

張作詩送硯反劒乃和其詩卒以劒歸之

贈君長鋏君當歌每食無魚歎委蛇一朝得見暴公子
櫛具欲與冠爭我豈比杜陵貧病叟終日長鑱隨短蓑
斬蛟刺虎老無力帶牛佩犢吏所訶故將換硯豈無意
恐君琬琢傷天和作詩反劒亦何謂知君欲以詩相磨
報章苦恨無好語試向君硯求餘波詩成劒往硯應笑
那將屋漏供懸河

去歲九月二十七日在黃州生子名遯小名幹
兒頗然穎異至今年七月二十八日病亡於
金陵作二詩哭之

吾年四十九羈旅失幼子幼子真吾兒眉角生已似未
期觀所好蹣跚逐書史搖頭却梨栗似識非分恥吾老
常鮮歡賴此一笑喜忽然遭奪去惡業我累爾衣薪那
免俗變滅須臾耳歸來懷抱空老淚如瀉水

我淚猶可拭日遠當日忘母哭不可聞欲與汝俱亡故

衣尚懸架漲乳已流床感此欲忘生一臥終日僵中年
忝聞道夢幻講已詳儲藥如丘山臨病更求方仍將恩
愛刃割此衰老腸知迷欲自反一慟送餘傷

葉濤致遠見和二詩復次其韻

濤顛倒
元韻

平生無一女誰復歎爾耳滯留生此兒足慰周南史那
知非真實造物聊戲爾煩惱初無根恩愛為種子煩公
為假說反復相指似欲除苦海浪先乾愛河水棄置一
寸鱗悠然笑侯喜為公寫餘習鉗壘一時恥

聞公少已悟拄杖久倚牀笑我老而癡負鼓欲求亡庶
幾東門子柱史安敢望嗜毒戲猛獸慮患先不詳囊破
蛇已走尚未省齧傷妙哉兩篇詩洗我千結腸黠蠹不
作蠱未老輒自僵永謝湯火厄冷然超無方

次荊公韻四絕

青李扶疎禽自來清真逸少手親栽深紅淺紫從爭發
雪白鶯黃也鬪開

斫竹穿花破綠苔小詩端為覓檀栽細看造物初無物

春到江南花自開

騎驢渺渺入荒陂想見先生未病時
勸我試求三畝宅
從公已覺十年遲

甲第非真有閒花亦偶栽聊為清淨供
却對道人開
公病

後捨宅
作寺

張庖民挽詞

東晉巾車令西京執戟郎甘心向山水
結髮事文章故
自輕千戶何曾羨一囊才高鬼神惡
骨朽姓名芳
度嶺

銘旌暗秦淮舊宅荒吾詩不用刻妙語有黃香

黃魯直作哀詩

次韻葉致遠見贈

欲求五畝寄樵蘇所至遲留似賈胡
信命不須歌去汝逢人未免歎猶吾
人皆勸我杯中物我獨憐君屋上烏
一枝文章何足道要言磨却是文殊

次韻杭人裴維甫

餘杭門外葉飛秋尚記居人挽去舟
一別臨平山上塔五年雲夢澤南州
淒涼楚些緣吾發邂逅秦淮為子留

寄謝西湖舊風月故應時許夢中遊

次韻段縫見贈

季子東周負郭田須知力穡是家傳
細思種薤五十本大勝取禾三百廛
若得與君連北巷故應終老忘西川
短衣疋馬非吾事只擬關門不問天

題孫思邈真

先生一去五百載猶在峨眉西崦中
自為天仙足官府不應尸解坐螭蟲

戲作鮎魚一絕

粉紅石首仍無骨
雪白河豚不藥人
寄與天公與河伯
何妨乞與水精鱗

同王勝之游蔣山

到郡席不暖
居民空惘然
好山無十里
遺恨恐他年
欲歎南朝寺
同登北郭船
朱門收畫戟
紆宇出青蓮

荆公宅已

為寺夾路蒼髯古
迎人翠麓偏
龍腰蟠故國
鳥爪寄曾巔

竹杪飛華屋
松根泣細泉
峰多巧障日
江遠欲浮天
略

釣橫秋水浮屠插暮煙歸來踏人影雲細月娟娟

至真州再和二首

老手王摩詰窮交孟浩然論詩曾伴直話舊已忘年北
上難陪驥東行且趁船離亭花映肉醉眼鷺窺蓮柁轉
三山沒風回五兩偏荒祠過瓜步古甃墮松巔聞道清
香閣新芻白玉泉莫教門掩夜坐待月流天小院檀槽
闌空庭樺燭烟公詩便堪唱為付小嬋娟

公顏如雪柏千載故依然笑我無根柳空中不待年肯

留歸闕旆坐待逆風船特許門傳籥那知箭起蓮相逢
月上後小語坐西偏流落千帆側追思百尺巔躬耕懷
谷口水石羨平泉茅屋歸元亮霓裳醉樂天行聞宣室
召歸近御爐烟未用歌池上隨宜教李娟

次韻荅寶覺

芒屨竹杖步行纏遮莫千山更萬山從來無脚不解滑
誰信石頭行路難

眉子石硯歌

與胡閭

君不見成都畫手開十眉橫雲却月爭新奇游人指點
小顰處中有漁陽胡馬嘶又不見王孫青瑣橫雙碧腸
斷浮空遠山色書生性命何足論坐費千金買消渴爾
來喪亂愁天公謫向君家書硯中小窓虛幌相嫵媚令
君曉夢生春紅毗耶居士談空處結習已空花不住試
教天女為磨鉛千偈瀾翻無一語

以玉帶施元長老元以納裙相報次韻

病骨難堪玉帶圍鈍根仍落箭鋒機欲效乞食歌姬院

故與雲山納舊衣

此帶閱人如傳舍流傳到我亦悠哉錦袍錯落真相稱
乞與佯狂老萬回

次韻滕元發許仲途秦少遊

二公詩格老彌新醉後狂吟許野人坐看青丘吞澤芥
自慙黃潦薦溪蘋兩邦旌纛光相照十畝鋤犁手自親
何似秦郎妙天下明年獻頌請東巡

送金山鄉僧

歸蜀開堂

撞鐘浮玉山迎我三千指衆中聞謦欬未語知鄉里我
非箇中人何以默識予振衣忽歸去隻影千江裏涪江
與中泠共此一味水冰盤薦琥珀何似糖霜美

送沈達赴廣南

嗟我與君皆丙子四十九年窮不死君隨幕府戰西羌
夜渡冰河斫雲壘飛塵漲天箭洒甲歸對妻孥真夢耳
我謫黃岡四五年孤舟出沒煙波裏故人不復通問訊
疾病饑寒疑死矣相逢握手一大笑白髮蒼顏略相似

我方北渡脫重江君復南行輕萬里功名如幻何足計
學道有涯真可喜岫嶁丹砂已付君汝陽壘盎吾何恥
君歸赴我雞黍約買田築室從今始

豆粥

君不見呼沱流澌車折軸公孫倉皇奉豆粥濕薪破竈
自燎衣饑寒頓解劉文叔又不見金谷敲冰草木春帳
下烹煎皆美人萍虀豆粥不傳法咄嗟而辨石季倫干
戈未解身如寄聲色相纏心已醉身心顛倒自不知更

識人間有真味豈如江頭千頃雪色蘆茆簷出沒晨煙
孤地確舂粳光似玉沙餅煮豆軟如酥我老此身無著
處賣書來問東家住臥聽雞鳴粥熟時蓬頭曳履君家
去

秦少游夢發殯而塋之者云是劉發之柩是歲
發首薦秦以詩賀之劉涇亦作因次其韻

君看三代士執雉本以殺身為小補居官死職戰死綏
夢尸得官真古語五行勝已斯為官官如草木吾如土

仕而未祿猶賓客待以純臣蓋非古餽焉曰獻稱寡君
豈比公卿相爾汝世衰道微士失已得喪悲歡反其故
草袍蘆箠相嫵媚飲食嬉遊事羣聚曲江舩舫月燈毬
是謂舞殯而歌墓看花走馬到東野餘子紛紛何足數
二生年少兩豪逸詩酒不知軒冕苦故令將仕夢發棺
勸子勿為官所腐塗車芻靈皆假設著眼細看君勿誤
時來聊復一飛鳴進隱不須煩伍舉

金山夢中作

江東賈客木絲裘會散金山月滿樓夜半潮來風又熟
臥吹簫管到揚州

次韻周種惠石鉞

銅腥鐵澁不宜泉愛此蒼然深且寬蟹眼翻波湯已作
龍頭拒火柄猶寒薑新鹽少茶初熟水漬雲烝蘚未乾
自古函牛多折足要知無脚是輕安

次韻蔣穎叔

月明驚鵲未安枝一棹飄然影自隨江上秋風無限浪

枕中春夢不多時，瓊林花草聞前語。罨畫溪山指後期，豈敢便為雞黍約。玉堂金殿要論思，

蔣詩記及第時瓊林宴坐中所言且

約同卜居陽羨

龜山辯才師

此生念念浮雲改，寄語長淮今好在。故人宴坐虹梁南，新河巧出龜山背。木魚呼客振林莽，鐵鳳橫空飛綵繪。忽驚堂宇變雄深，坐覺風雷生謦欬。羨師游戲浮漚間，笑我榮枯彈指內。嘗茶看畫亦不惡，問法求詩了無礙。

千里孤帆又獨來五年一夢誰相對何當來世結香火
永與名山躬井磴

贈潘谷

潘郎曉踏河陽春明珠白壁驚市人那知望拜馬蹄下
胸中一斛泥與塵何似墨潘穿破褐琅琅翠餅敲玄笏
布衫漆黑手如龜未害冰壺貯秋月世人重耳輕目前
區區張李爭媼妍一朝入海尋李白空看人間畫墨仙

徐大正閒軒

冰蠶不知寒火鼠不知暑知閒見閒地已覺非閒侶君
看東坡翁懶散誰比數形骸墮醉夢生事委塵土早眠
不見燈晚食或欺午臥看氈取盜坐視麥漂雨語希舌
頰強行少腰脚僂五年黃州城不踏黃州鼓人言我閒
客置此閒處所問閒作何味如眼不自覩頗訝徐孝廉
得閒能幾許介子願奉使翁歸備文武應緣不耐閒名
字挂庭宇我詩為閒作更得不閒語君如汗血駒轉盼
略燕楚莫嫌鑾輅重終勝鹽車苦

蒜山松林中可卜居余欲僦其地地屬金山故作此詩與金山元長老

魏王大瓠無人識種成何翅實五石不辭破作兩大尊
只憂水淺江湖窄我材濩落本無用虛名驚世終何益
東方先生好自譽孟賁子路并為一杜陵布衣老且愚
信口自比契與稷暮年欲學柳下惠嗜好酸鹹不相入
金山也是不羈人早歲聞名晚相得我醉而嬉欲仙去
旁人笑倒山謂實問我此生何所歸笑指浮休百年宅

蒜山幸有閑田地招此無家一房客

王中父哀詞

并叙

仁宗朝以制策登科者十五人軾忝冒時尚有富彥國
張安道錢子飛吳長文夏公西陳令舉錢醇老王中父
并軾與家弟轍九人存焉其後十有五年哭中父於密
州作詩弔之則子飛長文令舉沒矣又八年軾自黃州
量移汝海與中父之子洸之相遇於京口相持而泣則
十五人者獨三人存耳蓋安道及軾與家弟而已嗚呼

悲夫乃復次前韻以遺沆之時沆之亦以罪謫家于錢塘云

生芻不獨比前人束藁端能廢謝鯤子達想無身後念
吾衰不復夢中論已知毅豹為均死未識荆凡定孰存
堪笑東坡癡鈍老區區猶記刻舟痕

蔡景繁官舍小閣

使君不獨東南美典刑長記先君子戲嘲王叟短轅車
肯為徐郎書紙尾三年弭節江湖上千首放懷風月裏

手開東閣坐虛明目淨東溪照清泚素琴濁酒容一榻
落霞孤鶩供千里大舫何時繫門柳小詩屢欲書窓紙
文昌新構滿鵷鸞都邑正喧收杞梓相逢一醉豈有命
南來寂寞君歸矣

高郵陳直躬處士畫鴈二首

野鴈見人時未起意先改君從何處看得此無人態無
乃槁木形人禽兩自在北風振枯葦微雪落璀璨慘淡
雲水昏晶熒沙礫碎弋人悵何暮一舉渺江海

衆禽事紛爭野鴈獨閑絜徐行意自得俯仰老有節我
襄寄江湖老伴雜鶩鴨作書問陳子曉景畫苔雪依依
聚圓沙稍稍動斜月先鳴獨鼓翅吹亂蘆花雪

和王旂二首

旂平父子

異時常恠謫仙人舌有風雷筆有神聞道騎鯨遊汗漫
憶嘗捫蝨話悲辛氣吞餘子無全目詩到諸郎尚絕倫
白髮故交空掩卷淚河東注問蒼旻

嫋嫋春風送渡關娟娟霜月照生還遲留歲暮江淮上

來往君家伯仲間，未厭冰灘吼新洛。且看松雪媚南山，
野梅官柳何時動飛蓋。長橋待子閑。

次韻張畹

新洛霜餘兩岸隆，塵埃舉袂識西風。臨淮自古多名士，
樽酒相從樂寓公。半日偷閒歌嘯裏，百年待盡往來中。
知君不向窮愁老，尚有清詩氣吐虹。

次韻王定國南遷回見寄

土暈銅花蝕秋水，要須悍石相礮砥。十年冰蘂戰膏粱，

萬里煙波濯紉綺歸來詩思轉清激百丈空潭數魴鯉

逝將桂浦擷蘭蓀不記槐堂收劒履却思庾嶺今何在

更說彭城真夢耳

來詩述彭城舊游

君知先竭是甘井我願得

全如苦李妄心不復九回腸至道終當三洗髓廣陵陽

羨何足較只有無何真我里

余買田陽羨來詩以為不如廣陵

樂全老

子今禪伯

張安道也定國其壻

掣電機鋒不容擬心通豈復問云

何印可聊須答如是相逢為我話留滯桃花春漲孤舟

起

贈梁道人

採藥壺公處處過
笑看金狄手摩挲
老人大父識君久
造物小兒如子何
寒盡山中無歷日
雨斜江上一漁蓑
神仙護短多官府
未厭人間醉踏歌

題雍秀才畫草蟲八物

促織

月叢號耿耿
露葉泣漙漙
夜長不自暖
那憂公子寒

蟬

蛻形濁汙中羽翼便翔好秋來間何闊已抱寒莖槁

蝦蟇

悍月知誰瞋瞞腹空自脹慎勿困蜈蚣饑虵不汝放

蛻娘

洪鐘起暗室飄瓦落空庭誰言轉丸手能作殷牀聲

天水牛

兩角徒自長空飛不服箱為牛竟何事利吻穴枯桑

蝸虎

跂跂有足蛇脈脈無角龍為虎君勿笑食盡蠶尾蟲

蝸牛

腥涎不滿殼聊足以自濡升高不知回竟作粘壁枯

鬼蝶

雙眉卷鐵絲兩翅暈金碧初來花爭妍忽去鬼無迹

泗州南山監倉蕭淵東軒二首

偶隨樵父採都梁

南山名都梁山山出都梁香故也

竹屋松扉試乞漿

但見東軒堪隱几不知公子是監倉溪中亂石墻垣古

山下寒蔬七箸香我是江南舊遊客挂冠知有老蕭郎
北望飛塵苦晝霾洗心聊復寄東齋珍禽聲好猶思越
野橘香清未過淮有信微泉來遠嶺無心明月轉空堦
一官倉庾真堪老坐看松根絡斷崖

泗州除夜雪中黃師是送酥酒二首

暮雪紛紛投碎米春流咽咽走黃沙舊游似夢徒能說
逐客如僧豈有家冷硯欲書先自凍孤燈何事獨成花
使君半夜分酥酒驚起妻孥一笑譁

關右土酥黃似酒揚州雲液却如酥欲從元放覓拄杖
忽有麴生來座隅對雪不堪令飽煖隔船應已厭歌呼
明朝積玉深三尺高枕床頭尚一壺

章錢二君見和復次韻答之

黃昏已作風翻絮半夜猶驚月在沙照汴玉峯明佛剎
隔淮雲海暗人家來麴有信迎三白詹蔔無香散六花
詹蔔梔子花也與雪花皆六出欲喚阿咸來守歲林鳥櫪馬闌喧譁

分無纖手栽春勝况有新詩點蜀酥醉裏冰髭失纓絡

夢回布被起廉隅君應旅睫寒生暈我亦饑腸夜自呼
明日南山春色動不知誰佩紫微壺

正月一日雪中過淮謁客回作二首

十里清淮上長堤轉雪龍冰崖落屐齒風葉亂裘茸萬
頃穿銀海千尋渡玉峯從來脩月手合在廣寒宮
攢眉有底恨得句不妨清霽霧開寒谷饑鴉舞雪城橋
聲春市散塔影莫淮平不用殘燈火船窓夜自明

劉乙新作射亭

乙父嘗知眉州

蘭玉當年刺史家，雙韃馳射笑穿花。而今白首閑驄馬，
只有清樽照畫蛇。寂寂小軒蛛網遍，陰陰垂柳鴈行斜。
手柔弓燥春風後，置酒看君中戟牙。

孫莘老寄墨四首

徂徠無老松，易水無良工。珍材取樂浪，妙手惟潘翁。

潘翁

作墨雜用
高麗煤

魚胞熟萬杵，犀角盤雙龍。墨成不敢用，進入

蓬萊宮。蓬萊春晝永，三殿明房櫳。金箋洒飛白，瑞霧縈
長虹。遙憐醉常侍，一笑開天容。

谿石琢馬肝剡藤開玉版
噓噓雲霧出奕奕龍蛇綰
此中有何好秀色紛滿眼
故人歸天祿古漆窺蠹簡
隄麋給尚方老手擅編剗
分餘幸見及流落一歎赧

我貧如饑鼠長夜空齧齧
瓦池研竈煤葦管書柿葉
近者唐夫子遠致烏玉玦

唐林夫寄張遇墨半丸

先生又繼之圭璧

爛箱篋清窓洗硯坐
虵蚓稍蟠結便有好事人
敲門求醉帖

吾窮本坐詩久服朋友戒
五年江湖上閉口洗殘債
今

來復稍稍快癢如爬疥先生不譏訶又復寄詩械幽光
發竒思點點出荒怪詩成一自笑故疾逢蝦蟹

留題蘭皋亭

雪後東風未肯和扣門遷客夜經過不知舊竹生新筍
但見清伊換濁河無復往來乘下澤聊同笑語說東坡
明年我亦開三徑寂寂兼無雀可羅

和人見贈

只寫東坡不著名此身已是一長亭壯心無復春流起

衰鬢從交病葉零知有雪兒供筆硯應嗤竈婦洗盆餅
回來索酒公應厭京口新傳作客經

和田仲宣見贈

頭白江南醉司馬寬心時復喚殷兄寒潮不應淮無信
客路相隨月有情未許低頭拜東野徒言共飲勝公榮
好詩惡韻那容和刻燭應須便置觥

和王勝之三首

城上湖光暖欲波美人唱我踏春歌魯公賓客皆詩酒

誰是神仙張志和

齋釀如澠漲綠波公詩句句可弦歌流觴曲水無多日
更作新詩繼永和

要知太守憐孤客不惜陽春和俚歌坐睡樽前呼不應
為公雕琢損天和

記夢

并叙

樂全先生夢人以詩三篇示之字皆旁行而不可識旁
有人道衣古貌為讀其中一篇云人事且常在留質悟

圓間凡四句覺而忘其二以告其客蘇軾軾以私意廣之云

圓間有物物間空豈有圓空入井中不信天形真箇樣
故應眼力自先窮連環已解如神手萬竅猶號未濟風
稽首問公公大笑本來誰礙更求通

東坡全集卷十四

謹案卷十三第四頁後二行嗟我與公曹按施本

公曹作曹君

第六頁前五行巢子與誰鄰按施本與誰作誰與
第十一頁後五行一葉扁舟任漂突刊本舟訛州

據施本改

第十三頁後一行西來故父客刊本父訛交據施
本改


第二十二頁前八行院有蜀僧宣建事訥長老識

先君云按施本建作逮

第二十五頁後一行險出三峽右刊本險訛驗峽

訛峽並據施本改





總校官庶吉士臣張能照

校對官編脩臣朱攸

校對官助教臣金學詩

謄錄監生臣張君紱

謄錄監生臣徐士俊

欽定四庫全書薈要

集部

東坡全集卷十五

六

詳校官助教臣常循



欽定四庫全書薈要卷一萬四千八百四十七

集部

東坡全集卷十五

宋 蘇軾 撰

詩七十二首

寄蘄簞與蒲傳正

蘭溪美箭不成笛離離玉筍排霜脊千溝萬縷自生風
入手未開先慄慄公家列屋間蛾眉珠簾不動花陰移
霧帳銀牀初破睡牙籤玉局坐彈碁東坡病叟長羈旅
凍臥饑吟似饑鼠倚賴春風洗破衾一夜雪寒披故絮

火冷燈青誰復知孤舟兒女自憂吟皇天何時反炎燠
愧此八尺黃琉璃願公淨埽清香閣臥聽風漪聲滿榻
習習還從兩腋生請公乘此朝閭闔

寄恠石石斛與魯元翰

山骨裁方斛江珍拾淺灘清池上几案碎月落杯盤老
去懷三友平生困一簞堅姿聊自傲秀色亦堪餐好去
髯卿舍憑將道眼看東坡最後供霜雪照人寒

漁父四首

漁父飲誰家去魚蟹一時分付酒無多少醉為期彼此
不論錢數

漁父醉蓑衣舞醉裏却尋歸路輕舟短棹任斜橫醒後
不知何處

漁父醒春江午夢斷落花飛絮酒醒還醉醉還醒一咲
人間今古

漁父笑輕鷗舉漠漠一江風雨江邊騎馬是官人借我
孤舟南渡

李憲仲哀詞

并叙

同年友李君諱惇字憲仲賢而有文不幸早世軾不及與之游也而識其子廌有年矣廌自陽翟見余於南京泣曰吾祖母邊母馬前母張與君之喪皆未塋貧不敢以饑寒為戚顧四喪未舉死不瞑目矣適會故人梁先吉老聞余當歸耕陽羨以絹十匹絲百兩為贐辭之不可乃以遺廌曰此亦仁人之餽也既又作詩以告知君與廌者庶幾皆有以助之廌年二十五其文熒然氣節

不凡此豈終窮者哉

大夢行當覺百年特未滿遑衰已逝人長眠寄孤館念
我同年生意長日月短鹽車困騏驥烈火廢圭瓚後生
有奇骨出語已精悍蕭然野鶴姿誰復識中散有生寓
大塊死者誰不窾嗟君獨久客不識黃土暖推衣助孝
子一溉滋湯旱誰能脫左驂大事不可緩

贈眼醫王生彥若

鍼頭如麥芒氣出如車軸間關絡脈中性命寄毛粟而

況清淨眼內景含天燭琉璃貯沆瀣輕脆不任觸而予
於其間來往施鋒鏃笑談紛自若觀者頸為縮運鍼如
運斤去翳如拆屋常疑子善幻他技雜符祝子言吾有
道此理君未矚形骸一塵垢貴賤兩草木世人方重外
妄見瓦與玉而我初不知刺眼如刺肉君看目與翳是
翳要非目目翳苟二物易分如麥菽寧聞老農夫去草
更傷穀鼻端有餘地肝膽分楚蜀吾於五輪間蕩蕩見
空曲如行九軌道並驅無擊轂空花誰開落明月自朏

胸請問樂全堂忘年老尊宿

彥若樂全先生門下醫也

與歐育等六人飲酒

忽驚春色二分空且看樽前半丈紅
苦戰知君便白羽倦遊憐我憶黃封
年來齒髮老未老此去江淮東復東
記取六人相會處引杯看劍坐生風

觀杭州鈐轄歐育刀劍戰袍

青綾納衫暖襯甲紅線勒巾光遶脅
禿襟小袖鵬鷖盤大刀長劍龍蛇插
兩軍鼓噪屋瓦墜紅塵白羽紛相戛

將軍恩重此身輕
笑履鋒鏑如一搗書生
只可坐帷幄
談笑毫端弄生殺
叫呼擊鼓催上竿
猛士應憐小兒黠
試問黃河夜偷渡
掠面驚沙寒霎霎
何如大艦日高眠
一枕清風過茗雪

王伯敬所藏趙昌畫四首

梅花

南行渡關山
沙水清練練
行人已愁絕
日暮集微霰
殷勤小梅花
髣髴吳姬面
暗香隨我去
回首驚千片
至今

開畫圖老眼淒欲泣幽懷不可寫歸夢君家情

黃葵

弱質困夏永竒姿蘇曉涼低昂黃金杯照耀初日光檀
心自成暈翠葉森有芒古來寫生人妙絕誰似昌宸粧
與午醉真態合陰陽君看此花枝中有風露香

芙蓉

清颿已拂林積水漸收潦谿邊野芙蓉花水相媚好坐
看池蓮盡獨伴霜菊槁幽姿強一笑暮景迫摧倒淒涼

似貧女嫁晚驚衰早誰寫少年容樵人劒南老

山茶

蕭蕭南山松黃葉隕勁風誰憐兒女花散火冰雪中能
傳歲寒姿古來惟丘翁趙叟得其妙一洗膠粉空掌中
調丹砂染此鶴頂紅何須誇落墨獨賞江南工

寄吳德仁兼簡陳季常

東坡先生無一錢十年家火燒凡鉛黃金可成河可塞
只有霜鬢無由立龍丘居士亦可憐談空說有夜不眠

忽聞河東獅子吼拄杖落手心茫然誰似濮陽公子賢
飲酒食肉自得仙平生寓物不留物在家學得忘家禪
門前罷亞十頃田清溪遶屋花連天溪堂醉臥呼不醒
落花如雪春風顛我遊蘭溪訪清泉已辦布襪青行纏
稽山不是無賀老我自興盡回酒舫恨君不識顏平原
恨我不識元魯山銅駝陌上會相見握手一笑三千年

題王逸少帖

顛張醉素兩禿翁追逐世好稱書工何曾夢見王與鍾

妄自粉飾欺盲聾有如市倡抹青紅妖歌嫚舞眩兒童
謝家夫人談丰容蕭然自有林下風天門蕩蕩驚跳龍
出林飛鳥一埽空為君草書續其終待我他日不忽忽
書林逋詩後

吳儂生長湖山曲呼吸湖光飲山渌不論世外隱君子
傭兒販婦皆冰玉先生可是絕俗人神清骨冷無由俗
我不識君曾夢見瞳子瞭然光可燭遺篇妙字處處有
步繞西湖看不足詩如東野不言寒書似西臺差少肉

平生高節已難繼將死微言猶可錄自言不作封禪書

更肯悲吟白頭曲

逋臨終詩云茂陵異日求遺草猶喜初無封禪書

我笑吳人

不好事好作祠堂傍脩竹不然配食水仙王一盞寒泉

薦秋菊

和仲伯達

歸山歲月苦無多尚有丹砂奈老何繡谷只應花自染
鏡潭長與月相磨君方傍海看初日我已橫江擊素波
人不我知斯我貴不須雷雨起龍梭

春日

鳴鳩乳燕寂無聲日射西窓潑眼明
午睡醒來無一事
只將春睡賞春晴

贈袁陟

是身如虛空萬物皆我儲胡為強分別
百金買田廬不
見袁夫子神馬載尻輿游於無何有一飯不願餘官湖
為我池學舍為我居何以遺子孫此身自遽蔭薰風暗
楊柳秋水淨芙蓉應觀我知子不恠子知魚

蘇子容母陳夫人挽詞

蘇陳甥舅真冰玉正始風流起頽俗夫人高節稱其家
凜凜寒松映脩竹雞鳴為善日日新八十三年如一晨
豈惟家室宜壽母實與朝廷生異人忘軀徇國乃吾子
三仕何曾知愠喜不煩擁笏强垂魚我視去來皆夢耳
誦詩相挽真區區墓碑千字多遺餘他年太史取家傳
知有班昭續漢書

歸宜興留題竹西寺

十年歸夢寄西風此去真為田舍翁
剩覓蜀岡新井水要攜鄉味過江東

道人勸飲雞蘇水童子能煎鴛粟湯
輒借藤床與瓦枕莫教孤負竹風涼

此生已覺都無事今歲仍逢大有年
山寺歸來聞好語野花啼鳥亦欣然

與孟震同遊常州僧舍

年來轉覺此生浮又作三吳浪漫遊
忽見東平孟君子

夢中相對說黃州

湛湛清池五月寒
小山無數碧巔巘
穉杉戢戢三千本
且作凌雲合抱看

知君此去便歸耕
笑指孤舟一葉輕
待向三茆乞靈雨
半篙流水送君行

贈常州報恩長老

碧玉碗盛紅瑪瑙
井花水養石菖蒲
也知法供無窮盡
試問禪師得飽無

薦福老懷真巧便淨慈兩本更尖新憑師為作鐵門限
準備人間請話人

次韻答賈耘老

五年一夢南司州饑寒疾病為子憂東來六月井無水
仰看古堰橫奔牛平生管鮑我知子今日陳蔡誰從丘
夜航爭路泥水澁牽挽直欲來瓜州自言嗜酒得風痺
故鄉不敢居溫柔空將汎愛救溝壑衰病不復從前樂
今年太守真臥龍笑語炎天出水電時低九尺蒼鬚髯

我過三間小池閣故人改觀爭來賀小兒不信猶疑錯
為君置酒飲且哦草間秋蟲亦能歌可憐老驥真老矣
無心更秣天山禾

墨花

并叙

世多以墨畫山水竹石人物者未有以畫花者也汴人
尹白能之為賦一首

造物本無物忽然非所難花心起墨暈春色散毫端縹
緲形纔具扶踈態自完蓮風盡傾倒杏雨半披殘獨有

狂居士求為黑牡丹兼書平子賦歸向雪堂看

送竹几與謝秀才

平生長物擾天真老去歸田只此身
留我同行木上坐贈君無語竹夫人
但隨秋扇年年在莫鬪瓊枝夜夜新
堪笑荒唐玉川子暮年家口若為親

溪陰堂

白水滿時雙鷺下綠槐高處一蟬吟
酒醒門外三竿日臥看溪南十畝陰

次韻許遵

蒜山渡口挽歸艍朱雀橋邊看道裝
供帳已應煩百兩
擊鮮無久溷諸郎
問禪時到長干寺
載酒閒過綠野堂
此味只憂兒輩覺
逢人休道北窓涼

贈章默

并叙

章默居士字志明生公侯家才性高爽棄家求道不蓄
妻子與世無累而父母與兄之喪貧不能舉以是眷眷
世間不能無求於人余深哀其志既有以少助之又取

其言為詩以贈其行庶幾有哀之者

章子親未塋餘生抱羸疾朝吟噎隣里夜淚腐茵席前
年黑花生今歲白髮出身隨日月逝恨與天地畢願求
不毛田親築長夜室難從王孫裸未忍夏后塋五陵多
豪士百萬付一擲心知義財難耳就貧友乞不辭毛粟
施行自丘山積此志苟朝遂夕死真不戚誓求無生理
不踐有為迹棄身屍阨林鳥鳥任狼籍

送穆越州

江海相忘十五年，羨君松柏蔚蒼顏。
四朝耆舊水霜後，兩郡風流水石間。
舊政猶傳蜀父老，先聲已振越溪山。
樽前俱是蓬萊守，莫放高樓雪月閒。

贈葛葦

竹椽茆屋半摧傾，肯向蜂窠寄此生。
長恐波頭卷室去，欲將船尾載君行。
小詩試擬孟東野，大草閒臨張伯英。
消遣百年須底物，故應憐我不歸耕。

贈王寂

與君暫別不須嗟俯仰歸來鬢未華
記取江南烟雨裏
青山斷處是君家

南都妙峯亭

千尋挂雲闕十頃含風灣
開門弄清泚照見雙銅鑲
池臺半禾黍桃李餘榛菅
無人肯回首日暮車班班
史君非世人心與古佛閑
時邀聲利客來洗塵埃
顏新亭在東阜飛宇凌通闌
古甃磨翠壁霜林散煙鬟
孤雲抱商丘芳草連杏山
俯仰盡法界遙道寄人寰
亭亭妙高峰

了了蓬艾間五老壓彭蠡三峰照潼關均為拳石小配
此一掬慳煩公為標指免使懃躋攀

神宗皇帝挽詞三首

文武固天縱欽明又日新化民何止聖妙物獨稱神政
已三王上言皆六籍醇巍巍本無象刻畫愧孤臣

未易名堯德何須數舜功小心仍致孝餘事及平戎典
禮從周舊官儀與漢隆誰知本無作千古自承風

接統真千歲膺期止一章周南稍留滯宣室遂淒涼病

馬空嘶櫪枯葵已泣霜餘生臥江海歸夢泣蒿邱

金山妙高臺

我欲乘飛車東訪赤松子蓬萊不可到弱水三萬里不
如金山去清風半帆耳中有妙高臺雲峰自孤起仰觀
初無路誰信平如砥臺中老比丘碧眼照窓几巉巖玉
為骨凜凜霜入齒機鋒不可觸千偈如翻水何須尋德
雲即此比丘是長生未暇學請學長不死

贈杜介

并叙

元豐八年七月二十五日杜幾先自浙東還與余相遇
於金山話天台之異以詩贈之

我夢遊天台橫空石橋小松風吹茵露翠濕香嫋嫋應
真飛錫過絕澗度雲鳥舉意欲從之脩然已松杪微言
粲珠玉未說意先了覺來如墮空耿耿窓戶曉羣生陷
迷網獨達從古少杜叟子何人長歎萬物表妻孥空四
壁振策念輕矯遂為赤城游飛步凌縹緲問禪不歸舍
屢為瓠壺繞何人識此志佛眼自照燎我夢若見之卓

爾非魔嬈仙葩發茗椀翦刻分葵蓼從今更不出閉戶
閑騷褻時從佛頂巖馳下雙蓮沼

次韻孫莘老斗野亭寄子由在邵伯堰

落帆謝公渚日脚東西平孤亭得小憇暮景含餘清坐
待斗與牛錯落桂南甕老僧如夙昔一笑意已傾新詩
出故人舊事疑前生吾生七往來送老海上城逢人輒
自哂得魚不忍烹似聞績溪老復作東都行小詩如秋
菊艷艷霜中明過此感我言長篇發春榮

送楊傑

并叙

無為子嘗奉使登太山絕頂雞一鳴見日出又嘗以事
過華山重九日飲酒蓮花峯上今乃奉詔與高麗僧統
遊錢塘皆以王事而從方外之樂善哉未曾有也作是
詩以送之

天門夜上賓出日萬里紅波半天赤歸來平地看跳丸
一點黃金鑄秋橘太華峰頭作重九天風吹灑黃花酒
浩歌馳下腰帶鞋醉舞崩崖一揮手神遊八極萬緣虛

下視蚊雷隱汙渠大千一息八十返笑厲東海騎鯨魚
三韓王子西求法鑿齒彌天兩勑敵過江風急浪如山
寄與舟人好看客

次韻送徐大正

嘗與余約鄰於江淮間將赴登州同舟至山陽以詩見送留別

別時酒盞照燈花知我歸期漸有涯去歲渡江萍似斗
今年並海棗如瓜多情明月邀君共無價青山為我賒
千首新詩一竿竹不應空釣漢江槎

楊康功有石狀如醉道士為賦此詩

楚山固多猿青者黠而壽化為狂道士山谷恣騰蹂誤
入華陽洞竊飲茆君酒君命囚巖間巖石為械杻松根
絡其足藤蔓縛其肘蒼苔眯其目叢棘哽其口三年化
為石堅瘦敵瓊玖無復號雲聲空餘舞杯手樵夫見之
笑抱賣易升斗楊公海中仙世俗那得友海邊逢姑射
一笑微俛首胡不載之歸用此頑且醜求詩紀其異本
末得細剖吾言豈妄云得之亡是叟

迨作淮口遇風詩戲用其韻

我詩如病驥悲鳴向衰草有兒真驥子一噴羣馬倒養
氣勿吟哦聲名忌太早風濤借筆力勢逐孤雲埽何如
陶家兒遶舍覓梨棗君看強押韻已勝郊與島

次韻徐積

殺雞未肯邀季路裹飯先須問子來但見中年隱槐市
豈知平日賦蘭臺海山入夢方東去風雨留人得暫陪
若說峨眉眼前是故鄉何處不堪回

元豐七年有詔京東淮南築高麗亭館密海二

州騷然有逃亡者明年軾過之歎其壯麗留
一絕云

簷楹飛舞垣牆外桑柘蕭條斤斧餘盡賜昆耶作奴婢
不知償得此人無

過密州次韻趙明叔喬禹功

先生依舊廣文貧老守時遭醉尉嗔汝輩何曾堪一笑
吾儕相對復三人黃雞催曉淒涼曲白髮驚秋見在身
一別膠西舊朋友扁舟歸釣五湖春

再過常山和昔年留別詩

偃僂山前叟迎我如迎新那知夢幻軀念念非昔人江
湖久放浪朝市誰相親却尋泉源去桃花逢避秦

再過超然臺贈太守霍翔

昔飲雩泉別常山天寒歲在龍蛇間山中兒童拍手笑
問我西去何當還十年不赴竹馬約扁舟獨與漁蓑閑
重來父老喜我在扶挈老幼相遮攀當時襁褓皆七尺
而我安得留朱顏問今太守為誰歟護羌充國鬢未斑

翔自言在熙河
作屯田有功

躬持牛酒勞行役無復杞菊嘲寒慳起
然置酒尋舊迹尚有詩賦鑱堅頑孤雲落日在馬耳照
耀金碧開煙鬟却淇自古北流水跳波下瀨鳴玦環願
公談笑作石埭坐使城郭生溪灣

海市

并叙

予聞登州海市舊矣父老云常出於春夏今歲晚不復
見矣予到官五日而去以不見為恨禱於海神廣德王
之廟明日見焉乃作此詩

東方雲海空復空羣仙出沒空明中蕩搖浮世生萬象
豈有貝闕藏珠宮心知所見嗜幻影敢以耳目煩神工
歲寒水冷天地閉為我起蟄鞭魚龍重樓翠阜出霜曉
異事驚倒百歲翁人間所得容力取世外無物誰為雄
率然有請不我拒信我人厄非天窮潮陽太守南遷歸
喜見石廩堆祝融自言正直動山鬼豈知造物哀龍鍾
信眉一笑豈易得神之報汝亦已豐斜陽萬里孤鳥沒
但見碧海磨青銅新詩綺語亦安用相與變滅隨東風

登州孫氏松堂

萬松誰種已樅樅半嶺蒼雲映此邦
露重珠纓蒙翠蓋
風來石齒碎寒江
浮空兩竹橫南閣
倒景扶桑射北窓
坐待夕烽傳海嶠
重城歸去踏逢逢

過萊州雪後望三山

東海如碧環西北
卷登萊雲光與天色
直到三山回我行
適冬仲薄雪收浮埃
黃昏風絮定半夜扶桑開
參差太華頂出沒雲濤堆
安期與羨門乘龍安在哉
茂陵秋

風客勸爾麾一杯帝鄉不可期楚些招歸來

遺直坊

并叙

富鄭公之客李君諱常登人也故太守李公諱師中榜其閤曰遺直而其子大方求詩於軾為賦一首使君不浪出羔鴈親扣門先生但清坐薤水已多言當時邦人化市無晨飲豚歲月曾幾何客主皆九原曾經有餘歎楚些無歸魂我作遺直詩過者式其藩

次韻趙令鑠

東坡已報六年穰惆悵紅塵白首郎枕上溪山猶可見
門前冠蓋已相望故人年少真瓊樹落筆風生戰堵墻
端向甕間尋吏部老來專以醉為鄉

次韻王定國得賴倅二首

仙風入骨已凌雲秋水為文不受塵一噫故應號地籟
餘波猶足掛天紳買牛但自捐三尺射鼠何勞挽六鈞
莫向百花潭上去醉翁不見與誰春

滔滔四海我知津每愧先生植杖芸自少多言晚聞道

從今閉口不論文
灑翻白獸樽中酒
歸煮青泥坊底芹
要識老僧無盡處
床前牛蟻不曾聞

次韻趙令鑠惠酒

神仙無石髓
生世悲顛寓
坐待玉膏流
千載真旦暮
青州老從事
鬲上非所部
惠然肯見從
知我憎市酤
開筍自洗盞
肴核誰與具
門前聽剥啄
烹魚得尺素

送范純粹守慶州

才大古難用
論道常近迂
君看趙魏老
乃為滕大夫
浮

雲無根蒂黃潦能須臾知經幾成敗得見真賢愚羽旄
照城闕談笑安邊隅當年老使君赤手降於菟諸郎更
何事折箠鞭其雛吾知鄧平叔不鬪月支胡

次韻王震

攜文過我治平間霧豹當時始一斑聞道吹噓借餘論
故教流落得生還清篇帶月來霜夜妙語先春發病顏
詩酒暮年猶足用竹林高會許時攀

次韻王定國謝韓子華過飲

楚有孫叔敖長城隱千里哀哉練裙子負薪躡破履豈
無故交親逝去如覆水不如老優孟談笑託諧美世家
不可恃如倚折足几祥符有賢相手握天下砥礪敏亦
名公三貴德爵齒蓋棺今幾日公子誰料理誰要卿料
理欲說且止止宅相開府公久為蒼生起如何垂老別
水盤餽蒼耳親嫌妨鶚薦相對發微泚新詩如彈丸脫
手不移晷我亦老賓客苦語落紉綺莫辭三上章有道
貧賤恥

惠崇春江曉景二首

竹外桃花三兩枝，春江水暖鴨先知。
蒹葭滿地蘆芽短，正是河豚欲上時。

兩兩歸鴻欲破羣，依依還似北歸人。
遙知朔漠多風雪，更待江南半月春。

次韻周邠

南遷欲舉力田科，三徑初成樂事多。
豈憶殘年踏朝市，有如疲馬畏陵坡。
羨君同甲心方壯，笑我無聊鬢已皤。

何日西湖尋舊賞
淡煙疎雨暗漁蓑

次韻胡完夫

青山別淚尚爛斑
十載江湖困抱關
老去上書還北闕
朝來拄笏望西山
相從盃酒形骸外
笑說平生醉夢間
萬事會須咨伯始
白頭容我占清閑

次韻錢穆父

老入明光踏舊班
染鬚那復唱陽關
故人飛上金鑾殿
遷客來從飯顆山
大筆推君西漢手
一言置我二劉間

便須置酒呼同舍看賜飛龍出帝閑

再次韻答完夫穆父

二公自言先世同在西掖

掖垣老吏識郎君並轡天街兩絕塵
汗血固應生有種夜光那復困無因
豈知西省深嚴地也著東坡病瘦身
免使謫仙明月下狂歌對影只三人

次韻答滿思復

自甘茅屋老三間豈意彤庭綴兩班
落紙雲烟供醉後詩成珠玉看朝還
誰言載酒山無賀記取啼烏巷有顏

但恐跛牂隨赤驥青雲飛步不容攀

東坡全集卷十五